

Tali.

Olligi nääriõdak kätte jõuden,nääripidu peeti rahvamaja saalin,koolimajan es ole säändest suurt saali,et kik latse ja pidulise oles ärä mahtunu.Miu esä ands selle jaos oma gaasilambi,tu pandi rahvamaja saali lave ette rippume,saal olli sis peris valge.Meile,koolilastele olli õpatu laule ja luuletusi midä me rahvale esitime,esigi näitemäng olli.Pääle sedä iiskava tulli näärivana ja hakas küsume midä kennigi mõistab,tolle iist ands sis kingituse paki,meil latsil olli rõõmu pallu.Pääle pidu hakasime kodu poole mineme,meil olli hulka maad minnä,naabre mõtsavaht võts meid oma saani pääle,hoben sumbas läbi paksu lume ja saan läits mitu kõrda ümmer.Suu ja silmä ollive lume täis ku säält hangest vällä ronisime.Kuu paists ja olli iki väege ilus läbi mõtsa kodu sõita,muist maad tulli viil jalgsi kah minnä,naabrimiis käänds oma tiotsast sissi.Ku me lätsime esä ja emäge läbi tihe kuusiku,juusk meil äkki üits suur luum vastu ja tahts miu manu kangesti tulla.Emä hakas rüükme,et nüid süüb hunt latse ärä.Parasjagu tulli kuu pilvetagast vällä ja näime,et sii olli me oma suur koerake,temä jo minnu hoids kangesti.Koer olli meil vastu tullu,kikel olli koerast ütlemede hää miil.

Olligi sis taline koolivaheaig kätte jõuden,väge hää olli kodun olla.Sai vällän kelguge sõita ja koertege müüräte,meil olli sis mitu peni kodun,üits olli häste suur kõllane koer.

Temäl olli Tuhku nimes,papi pands tedä miule kelgu ette ja mia sis sõitse ninda et lumi lennäs.Tuhkuge sai kah pagemist mängi,mia pagesi ärä ja papi käkse koera,et otsku tütt üles,varsti peni olligi joba miu man.

Tõine koer olli esä jahipeni,ilus hagijas,Maks olli nimes.Maksige johtus meil suur äpärdus,ütel õhul es ole Maksi kunnigil,hõigati tedä terve õdang aiga .Hommuuku läits papi otsma,hulga aa peräst tulli papi kurva näoge ja Maksi kaalarihm olli peon.Hunt olli peni ärä söönu,pallalt kaalarihm ja sabajupike ollive viil mõtsan mahan. Kolmas koer olli Taks,tollege käis esä rebäsejahti aaman.Olli ka viil üits karjapeni,Muri nimes.Ninda pallu olli sis tolaal meil penisid.